

12/08/2002

Hanya pemastautin layak mengundi

KUALA LUMPUR, Ahad - Suruhanjaya Pilihan Raya (SPR) akan menentukan bahawa hanya pengundi yang menetap di sesuatu kawasan pilihan raya layak mengundi di kawasan itu, bukan "dibawa" dari luar tempat pemastautin, kata Datuk Seri Dr Mahathir Mohamad.

"Sekarang ini, SPR nak tentukan di mana orang itu tinggal, di situ dia mengundi," katanya ketika ditemui selepas menyampaikan hadiah pada kejohanan Sukan Berkuda Antarabangsa 100 tahun Kelab Polo dan Menunggang Kuda Selangor (SPRC) di Ampang Hilir, dekat sini hari ini.

Perdana Menteri berkata, peraturan baru itu dibuat bagi mengelak tindakan tidak bertanggungjawab sesetengah pihak yang memindah pengundi dari kawasan lain bertujuan memenangkan calon mereka.

Dr Mahathir memberi contoh bagaimana 2,000 pemilih di kawasan Parlimen yang diwakilinya iaitu Kubang Pasu dipindahkan oleh parti Pas ke kawasan Dewan Undangan Negeri (DUN) Anak Bukit di Kedah baru-baru ini.

Kerusi DUN Anak Bukit dimenangi calon Pas, Amiruddin Hamzah menewaskan ahli veteran Umno, Datuk Zakaria Said dengan majoriti 508 undi dalam pilihan raya kecil bulan lalu.

Setiausaha SPR, Datuk Wan Ahmad Wan Omar ketika dihubungi hari ini menjelaskan bahawa peraturan baru seperti dinyatakan Dr Mahathir itu sudah dikuatkuasakan mulai 16 Julai lalu menerusi Peraturan-Peraturan Pilihan Raya (Pendaftaran Pemilih 2002).

Wan Ahmad berkata, peraturan baru itu menetapkan bahawa pendaftaran pemilih baru diwajibkan mengikut alamat dalam kad pengenalan. Bagaimanapun, ia tidak membabitkan pemilih lama yang didaftarkan sebelum 16 Julai lalu kecuali mereka memohon pertukaran alamat, yang juga mesti mengikut alamat baru dalam kad pengenalan mereka sebagai tempat mengundi.

Mengenai persempadanan semula kawasan pilihan raya, Dr Mahathir berkata, penghijrahan keluar beramai-ramai penduduk dari Terengganu misalnya menyebabkan tiada pertambahan kerusi Parlimen dan DUN di negeri terbabit manakala di Kelantan cuma membabitkan pertambahan kerusi DUN, bukan Parlimen.

"Ini mengikut jumlah penduduk. Kelantan dan Terengganu...orang tak suka nak duduk di bawah pemerintahan Pas, dah lari habis dah. Dia mari duduk di sini," katanya.

Dr Mahathir diminta mengulas dakwaan parti-parti pembangkang bahawa persempadanan semula kawasan pilihan raya sebagai tidak adil dan memberi banyak kelebihan kepada Barisan Nasional (BN).

Berikutan itu, DAP, Pas, Parti Keadilan Nasional (Keadilan) dan Parti Rakyat Malaysia (PRM), dijangka mengemukakan bantahan masing-masing kepada SPR dalam tempoh sebulan cadangan yang menyaksikan pertambahan 25 kerusi Parlimen dan 59 kerusi DUN itu dipamerkan mulai Khamis lalu.

Mengenai dakwaan pembangkang yang menuduh SPR diperalatkan oleh BN apabila banyak kawasan mereka dipecahkan dan tidak ada tambahan kerusi bagi Terengganu sedangkan Johor dan Sabah menerima banyak tambahan, Dr Mahathir berkata semua perkara yang dilakukan dibantah oleh pembangkang.

"Dia mencarut pun tak apa, dia buat apa pun, jangan sampai tegur. Pasal apa? Pasal dia pembangkang. Dia pecah undang-undang pun tak apa. Mereka adalah manusia "istimewa"," katanya menyindir.

Bagaimanapun katanya, terpulang kepada SPR untuk menjalankan tugas persempadanan semula kawasan pilihan raya itu.

Beliau yang juga Presiden Umno berkata bahawa parti itu akan membincang

mengenai penubuhan jawatankuasa penaja untuk mentadbirkan bahagian Umno yang baru berikutan kewujudan kerusi baru berkenaan.

Menerusi persempadanan semula itu, SPR mengesyorkan penambahan 25 kerusi Parlimen dan 59 kerusi DUN dengan Johor mendapat tambahan terbanyak iaitu enam Parlimen dan 14 DUN diikuti Sabah (lima Parlimen, 12 DUN) dan Selangor (lima Parlimen, enam DUN).

Ini diikuti Pahang dengan tiga Parlimen dan empat DUN), Pulau Pinang (dua Parlimen, tujuh DUN), Perak (satu Parlimen, tujuh DUN), Negeri Sembilan (satu Parlimen, empat DUN), Melaka (satu Parlimen, tiga DUN), Wilayah Persekutuan Kuala Lumpur (satu Parlimen) dan Kelantan (dua DUN).

Jumlah bahagian pilihan raya di Perlis, Kedah, Terengganu dan Wilayah Persekutuan Labuan tidak berubah. Kajian persempadanan semula kali ini tidak membabitkan Sarawak yang sudah dilakukan pada 1996. Urusan persempadanan semula dilakukan setiap lapan tahun sekali.